

zuzendariari

(0034) 943 300 222

OHARRA: Ahalik eta iritzi gehienek izan dezaten tokia, ez da komeni makinazko 15 lerro baino luzeago idaztea gutun hauetan. Idatzi duenaren izena, telefonoa, helbidea eta NAren zenbakia agertu beharko dira. Laburtu behar izanez gero, zuzendaritzak bere esku du horretarako eskubidea. Erdaraz iristen diren gutunak ez dira argitaratuko.



zuzendariari@egunkaria.com



Martin Ugalde kultur parkea 20140 Andoain

Inbasioaz

Edorta Agirre • ZUBIETA

Israel-Palestina eta AEB-Irak tragediei «gerra» esaten zaie baina, ustez, inbasioa askoz ere egokiago da. Espainia-Frantzia eta Euskal Herriaren arazoan bezala.

«Hiltzaileak» eta «pistola gabe deus ez zarete» oihukatzen zitzaizen larunbatean Andoaingo Batasuneko (ez ETako) alkatte eta zinegotziei. Gezurra, absurdua, makina bat aldiz frogatu den bezala. Egin dezagun ispiluaren proba: Pleno Aretoan zutik zinetenok zer zarete pistola gabe, Armada gabe, gerra zikina gabe, tortura gabe, txibato gabe, GAL gabe, AEBren laguntza gabe, printzipioak traizionatu gabe, poliziak eta parapoliziak gabe, hedabideak gabe, nepotismoa gabe, Eliza

katolikoaren laguntza gabe, Banka gabe, herri-diruaz baliatu gabe, aldeko Epaitegiak gabe...?

Ikusten? Hori guztia beste inoren Herrian eta bertako jendearen kontra erabiltzen denean inbasioa deritzo horri. Zuen arazoa ez da ETA (bakarrik), Euskal Herria zeharo, erabat, osorik suntsitzea baizik.

Hasierara bueltatzea

Maite Leanizbarrutia (BAKeko kidea)

Larunbat honetan ETak beste euskal hiritar bat erail digu. Hildakoa nor zen jakin nuen unean nahi gabe, bere larruan jarri nintzen, Josebak azken urteotan eraman duen bizitzari buruz hausnarketa egiten saiatuz; heriotzara arte mehatxatua eta jazarria izan den gizon euskalduna. Ez da

erraza Josebak edo bere familiak sentitu duten izuaren osotasunaz jabetzea, eta badirudi hau ez dela nahikoa izan, ez da izan nahikoa Joseba hiritar bezala ezeztatzen saiatzea, aita bezala, alderdi politikoko militante bezala, senar bezala, seme eta neba bezala, elkarte bateko kide bezala, lagun bezala, andoaindar bezala, langile bezala, euskaldun bezala, fisikoki desagerraraztea ere ezinbestekoa zen. Gure izenean jarduten direla diotenek lortu dute bere helburua: Joseba izutu eta erailtzea. Igandean, Euskal Herriko Bakearen Aldeko Koordinakundearen Gasteizko Posta enparantzako isilunean egon naiz, han nire atsekabea, nire elkartasuna, eta nire laztura adierazi dut, ETak ez diharduela nire izenean esan dut isilean. Eta beste jende mordo batekin batera egin

dut. Denok batera, isiltasunean. Uste sendoa daukat Euskal Herriko gehiengoak nik sentitu dudana sentitzen duela. Seguru nago gu ordezkatzeko gaituzten politikariek ere nik sentitu dudana sentitzen dutela, baina nire ustez hau ez da nahikoa; bere fede onean konfiantza dudana bezala, bakoitzak bere proiektuarekin herri honentzat onena lortzea nahi duela uste dudana bezala, erantzukizuna eta batasuna eskatzen diet, zilegi diren egitasmo politikoen gainetik dauden gauzetan bat egitea. Alderdi politikoei elkarrekin ezartzea eskatzen diet, eta gaur arratsaldeko isiltasuna apurtu behar badute, dolu, errespetu eta batasuneko isiltasuna, adostasunera heltzeko apur dezatela, jarreraren hurbiltze batera, herri honetako bakegintzan bat eginda aritzeko.

montxo



galdeiozu... ?



NAGORE ARANBURU

Aktorea

Zein izan da interpretatzea egokitu zaizun paperik zailena?

Izaskun Bengoa (Gasteiz)

Ez da pertsonaia konkretu bat. Orain arte egokitu zaidan lanik zailena une honetan teledibistan egiten ari naizena da. Antzerkian edo telesailetan, pertsonaia bakarra lantzen ohituta nago, eta denbora asko izaten dut entseguetan prestatzen joateko. *Sorginen Laratzean* berriz, gehiago da bat-bateko lana. Programa bakoitzean pertsonaia berriak ateratzen dira, askotan oso desberdinak eta erregistro zabala izan behar da guztiak txukun egiteko. Inprobisatzeko lanetan iaioa izan behar da, eta hori da niri zailen egiten zaidana. Erosoago ibiltzen naiz presaketarako denbora gehiago egoten den lanetan.

hirusta



Joseba Otondo

Elsuntsa

Hementxe gabilta, izerdi uretan leher egin hurren. Erakusle ekonomikoaren grafikoak goiti egin dezaten akituta, produkzioa handituz hazkunde ekonomikoa bulkatzeko. Zenbatenez gehiago ekoizti, gehiago edukiko baitugu banatzeko? Eskerrak lana zigor biblikoa zela! Irrimangarriena hala ere, lanpostuen sortzeko industri arialdiak nola laguntzen dituzten da, eta nola iraunarazi nahi dituzten! Anitzetan, gainera, gauzarik hutsalenak ekoizteko; publizitatearen bidez, sortutako beharrak asetzeko. Eta gizakiak arrazionalak garela erraten dute... Tximinoen zirkunstantzia aurpegia, beren jendaki ominidoei begira. Gure jendakiak baino aitzinatua goak izatearen kondizioa, edo eroek bezala kontsumitzeko aukera. Zer erremedio gainera! Zer produzitu edukitzekoan, kontsumitu beharko baitugu; zer produzitu edukita, denok lana edukitzeko. Aldaketa

genetikoen ikaraz gabilta eta denak lasai, jendea soldatapeko esklabo bihurtzeraino deformatuz. Enplegu beteak erraten dute.

Lanak libre eginen zaituzte dintelaren azpitik desfilatzen egunero. Lana gizarte eskubidea, Zuzenbide eta gizarte Estatu guztietako bibliotan idatzia... Otoitz gure alde! Bertze nonbait eta bertze noizbait akaso, hobekiago bizitzen ahalko gara, bizkitartean lanari gorazarre. Lana ausarki eta kontsumitu neurrigabe. 40 urtez bakera eta aitzinamendua eduki genituen, orain bertze hainbertze. Hori bai, lau urtetik behin eskaparatea aldatzeko aukerarekin.

Eta halako pentsamendu ilupeekin gabilta, urrea balio duen denbora alferrik galtzen. Irudikatuz eta amestuz bihartik aitzinerat gutiengo kontsumitzen hasiko bagina, hau dena nola gainbehera etorriko zen... Hain gauza elsuntsarekin, bihar gutiengo kontsumituta.